

Yuda

Yudaño Miti Kine Qeke

¹ Yuda, na, Yesu Kristo wane urata ñei, so na Yakop wane ñole, noño Anutuño ñidora newan ñungi sari Anutu Magak wane wet maepko Yesu Kristo ño korautñungi anaine teweke gemami, ñine kibi iwa qe ñibonmaile. ² Wet menañ, peam so wet maepño maine ñinano watkeware payake.

Isi Kito Ebo Ebon Ñei Enane Girem Don

³ Kima maep kopne, na Anutuño urata maki paki ñei ñerep korop ñebu mainñone enino birañonge, ea wane don kisiine qe ñibonikalane zok nan okanmaike, pakimo ukude yemo don iwa yale qe ñibonmaile, naso maneo me korop Anutuño ñei ñerep magukoune mali malip wane numa makoboe ñebonge, yewa isisi ñei, mali malip wane ñabaine gemami, edo kito ñibonikei wane, ñine togole more mali malip yewa wane diamine maikei, paki isisi ñei enane don yewa qe esopkau ariake. ⁴ Ñei natne Anutu midaine, ene mo sanká sari doku tau tau magu keuzo ketkoi, ene keuzo maine gemaine, so ene doku tau tau magu tanik geu paki, mitiene midaine okane bailalañ urata ma okan okanmami, paki ene kine kineene Anutu wane don maineño kawetka more doku tau tau tanik so koboine yale ge ma okanmami, Yesu Kristo ñenane Suaineze so Waomze weku qaisikka okanmami. Mokaka Anutu wane Papiao ñei yaline enane don iwa yale qekoi, ñei

yaline eɲe Anutu wane kaitko seu seu wane biɲek okangoi gemami.

Mokaka Turuɲine Zinge Ebonge Eɲane Don

⁵ Nɲine don kisi mo detwaremami, ɲo na koso yewaka qe wirike ɲidanbe, Waom eɲe Israel ɲei ɲerep Ezipt kepeo ɲine ebu seseone sarike, ɲo siluɲ eɲane keueno ɲine ɲei ɲerep natne eɲe ɲado aɲaine birau paki donine qelige ɲadekkau, Waomɲo qeliɲongi seukwarekoi. ⁶ So aɲelo ware ware urataene kito qoke more enɲene kepe matene qeliɲakoi, eɲe papa togon wane mulap togogoleɲo kie meteene wokonge more qei panaman kotino biraonge, yewao Anutuɲo ma peseongi Naso wane toma pamami, Naso yewa bomileki baɲ turuɲine eboniake, eɲe don urata suaine Anutu wano maikei ea wane toma pamami. ⁷ So Sodom, Gomora so mat loli lolik mere arike, eawane ɲei ɲerewekoune eɲe aɲelo edo okangoi, tanik yalewaka okangoi, eɲe bailalaɲ okane borikine kine kine yau yaup ɲei ɲerep auye ma ariu madoɲ madoɲine zok wakonge, yale okanbi, Anutu gerep togongo biraongi ket warekoi, wikile dere gemami, eamo korop ɲenane girem yewa didiwo detkaɲem paki kaetɲongi, tanik borikine yewa mi okangene.

Miti Matali Matali Nɲei Eɲane Don

⁸ Rokop yalewaka Nɲei Matali Matali iwa eɲe kulu kau yewaɲo wetene maingeki enɲene solaene tutule yewa borikine ma okanmami, paki Waom ebu ket biraone more, qeliwo aɲelo qeli ewe zonomenerop eɲe mabaikon okanmami. ⁹ Mokaka, Mikael eɲe aɲelo ɲetneene, ɲo Satan

gorop Mose wane parejinane sorin nagu more Satan rake “noŋo makale”, raki anjelo Mikael rake, “noŋo makale” raki sori sorin au more Satan don borikine olasiakane detki, qekake, paki iwa yaleka olatke, “Waomŋo turuŋine giniake.” ¹⁰ No ŋei iwa eŋe kine kine korop yewa wane mabaikon okanmami, ŋo eŋe ea wane kine mi detmami, ŋo tanik kine kine korop kineine detmami, yemo osom eŋane rokop dereretene midaine, eŋe yaup wetene ŋoka okangei. ¹¹ Yai, eŋe ge mage daleo okangei? Kainŋo ŋole qe more sot ma wakonge, numa yewa mogare gesokmami. So mane yemo, Balam eŋe Israel wesi wane soakone more, Anutu wane kaitko sot ma wakonge, ŋine yale waka wesi aboŋ wane bailalaŋ okane more solanine qaisikau sot turuŋ Anutu wane kaitko okanmami. Koranŋo sogino Anutu wane urata ŋei Mose yuankayakane okane more, Anutu wane don qeki paki sot maratki paki seukke. ŋine yale waka Anutu wane urata mama ŋetne yuanka more, numa eaka gesokeiwo, ŋei yaline, Anutuŋo mataliŋungi siukke mida lelekei.. ¹² Nei yaline eŋe sigit diinerop, ŋinane ruo ŋara nene lewa lewan ŋino ŋara soep wane batneka sari sarine gamuene midaine, ne bat oka okane, yale. Eŋe weku enŋeneka warenagu okanmami, ŋei yaline eŋe kezŋo momoŋo tewekone arimaiké, paki koya mi waranŋka sarimaiké wele midaine, yale. Eŋe eki wele qe qe nasoeno wele mi qe okan mami, paki ŋodoenerop lokake qakŋem pa seuk okanmami, ea wane rokop. ¹³ Eŋe kiwet dibomineŋo suamaike yale, Borikine kine kineene gamuinerop yewa wane sopolopotne

didiwo wakon okanmaike yale. Eņe serekin edo qeliwo yau yaup ari okanmami yale, ņei yaline eņane mat urum yemo di panaman papa togon, yewao naso banem gekeiwane Anutuņo binjek qe ebonge.

Enokņo Nasoo Turuņine Maratkaikenane Done Ra Wakonge

¹⁴ Adam wane doko ņosa ņabokoune wakone sarimage atak 6 okangi Enok wakonge, pakimo Enokņo mokaka ņei borikine yaline eņane don iwa yale eņane kineene ra qelaņane edange, “Kau! Waom eņe baņ aņelo magukoune koboboine, tausen magu suaine eņerop lotkekei, ¹⁵ lotke more, ņei ņerep korop kineene ma wakon wareake. So ņei Anutu midaine borikine mama, eņe borikineenane turuņine makoke ebon wareake, ņei Anutu midaine, borikine mama eņe sigit borikine korop okangoi, so masi tanik borikine mi oka okane yewa korop ra ma okane Anutu ņabakakoi!” ¹⁶ ņei yewa eņe naso banem qouņ qouņ kito more, ņei natne bokaon okan okanmami, eņe borikine kine kine wane simile dere more ea mogare ari okanmami, eņe wawaine don rau paki enņene solaene mawa nagu okanmami, eņe ņei natne kelok okanone more aboņ kine kineene yaup ebuma okanmami.

Girem Don

¹⁷ ņo kimakop, ņine yemo Waomze Yesu Kristo wane aposolokoune edo don rakoi, yewa dere malipkaikei. ¹⁸ Eņe iwa yale ņidangoi, “Baņ Naso qoeakane okangi ņei natne wakone more Anutu bat mau paki tenikņunikei, paki Anutu midaine

gege, enņene numaene borikine yewa mogare geu paki Anutu ṅadekkaikei.”¹⁹ Neı yaline eņe doku tau tau magu mapok qepok okanon okanmami, eņe kepe neı eņane dereretka mogare ge okanmami, paki Asu Koboboine midaine wet seuseune gemami.²⁰ No kimakop, ṅine yemo naso baņem mali malip koboine wele yewaņo nabok okanņungi takorakot togole ge arikei, paki Asu Koboboinane zonomgo naso baņem meņenka gekei.²¹ Yale, okanbi paki Anutu wane wet maepko bororom gekei, so Waomze Yesu Kristoņo wet peseinane gege togon ṅiboniakane tomaka gekei.

²² Neı natne wet etkeka gemami, eņane wet borik desikei.²³ Paki mapitone more gerep bolam koto ṅine ebuwi sakesikei, so neı natne eņane wetņine weneņ boriki enņenane eweene kito-more mapik onikei, paki takot laplapene boriki-neeneņo maki panaman oka okane, yewa qikka kakakkaikei, yewa yemo Anutu wane kaitko me deino mo kine kine yaline eņe korop panaman so borikine okan waremaiķe.

Bakom Meņe Meņen

²⁴ Waomzeņo kito qesiņ okanņune more wareņune lukki, mi ket rasukei, ea wane mi ṅaņaemaıķe, paki ṅibuki sot midaine so oi bakom gorop qeli ewe zonominane kotino lotkekei, Anutu weku, eņano lotkekei.²⁵ Eņe Anutu weku, eņe Waomze Yesu Kristo wane ra more qesi qesiņze gemaıķe, eņe eņetine mawakaıķene, kibi qelaņanso qeli ewe zonominerop, Neı Waomze weku gemaıķe, eņe zomine kakapa,

so kine kine korop qeli kotino so kepe kutno pa waremaike ea wane lewet. Eņe mokaka geke, so ukude gemaike, so baņ naso baņem takorakot ge ari geake! Weleka.

Waom Yesu Wane Sigi Maep Don
The New Testament in the Ono Language of Papua
New Guinea
Nupela Testamen long tokples Ono long Niugini

Copyright © 1991 The Bible Society of Papua New Guinea

Language: Ono

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 11 Nov 2022 from source files dated 22 Nov 2019

646541a1-8d36-5993-802c-6bb850da5963